

CARTA DE VALORS DE L'ASSEMBLADA OCCITANA *occitan niçard*

L'Assemblada Occitana es una associacion que vòu far ligament entre lu actors que trabalhan per avidar la vida occitana e mai vòu èsser una maion comuna per aqueu mond. Ja que vòu recaptar li valors que si pòdon exprimir dins aqueu teissut de vida puslèu qu'afortir aqueli que li serian pròprii, l'Assemblada Occitana s'empara sus un sòcle minim de valors partejadi.

I - **Respècte de la persona umana.** L'Assemblada Occitana es pas compatible emb li ideologias que nègan lo prètz universau de la vida umana. Tota pensada, tot voler ò tot fach de discriminacion, de negacion dei drechs umans, de racisme, de misoginia e d'omofobia non poiràn degunament èsser tolerats per l'Assemblada Occitana. Ja deuràn èsser extremats en defòra de l'associacion.

II - **Defensa de la libertat e de la democracia.** L'Assemblada Occitana es estacada de fons ai principis dei drechs collectius, a l'ideau democratic e ai libertats individuali e fundamentali de la persona umana. Minga entrava a aqueli valors serà tolerada dins l'associacion.

III - **Reconoisença d'una realitat occitana.** L'Assemblada Occitana es una associacion en lenga occitana per l'espelida de l'occitanitat (lu trachs lingüistics, culturaus ò politics que pertòcan l'occitan). Aquelu que nègan ò desconoisson l'existéncia d'aquela occitanitat non trobaràn en l'Assemblada Occitana una maion. E mai, ja que l'Assemblada Occitana recapta mai d'una concepcion de l'occitanitat, ela i ve un subjècte politic. E aquel engatjament politic es assumit per l'Assemblada Occitana.

IV - **Esperit de consens.** La pluralitat de sicaps e d'opinions, de còps li bregas, son lo juec normau d'un movement coma l'occitanisme e l'Assemblada Occitana o non vòu negar. Totun, l'amira de l'Assemblada Occitana es d'ajudar au trabalh comun e a la convergéncia dei actors en favor de l'occitanitat. Per tant, es pas un luec ont cauga agusar de diferéncias d'opinions mas un luec de recèrca de consens. Non s'espèra que lu actors qu'intran dins l'Assemblada Occitana sigan d'acòrdi emb tot e emb toi lu autres sòcis, solament que respècten l'Assemblada Occitana coma escadença de s'encontrar e d'aprestar de projectes comuns.

V - **Dobertura.** L'Assemblada Occitana vòu aculhir de mond d'originas diferenti e de còps tractar emb de gents estrangieri a l'occitanisme. Tolerància intèrna e pedagogia extèrna, si que son de valors nòstri.

VI - **Lo voler.** L'Assemblada Occitana vòu recaptar primier d'actors de l'occitanitat —mas non si substituísse a aquelu actors— e espia vèrs l'accion. La fam d'obrar per la vida occitana es l'arsec que n'incita. Tot sòci de l'Assemblada Occitana participa ai enjuecs de societat segon li sieus capacitats e promòu tostemps li valors de l'occitanisme.

VII - **Actitud.** Tot sòci de l'Assemblada Occitana si compòrta d'un biais respectuós e s'absten de tot acte immorau.

En signant aquesta carta, ieu sossignat/ada, _____
(nom d'ostau, prenom) m'engatgi a n'aplicar lo contengut. E siáu conscient/a qu'en cas de non-respècte de la charta, mi pòdon prepauar de mesuras correctivi e pòdi far l'objècte d'una exclusion de l'Assemblada Occitana.

Luec:

Data:

Signatura: